

Blera bagnvuglientscha pigl dirigent partent

Savognin: Concert digl Chor viril Surses

DA GION NUTEGN STGIER / ANR

■ **Cantadours ed auditori on purschia en cumgea cordial agl dirigent partent. Cun buna raschung è igl public alla fegn digl concert imposant sa dulzo per mussar respect anvers mintga cantadour, ma surtot per mussar l'attashedad e rancunaschientscha tar Luzius Hassler.** En concert tgi è ia fitg a cor, ena prestaziun maximala digls passa 60 cantadours, en grond auditori, tot chegl è *Luzius Hassler*, igl dirigent digl Chor viril Surses, ple tgi angal mirito tar sies concert da cumgio. Er schi el è ainten chels 15 onns scu dirigent premuro digl chor da vallada mai lia star aint igl center, da Pasca seira an sala Grava a Savognin è Luzius Hassler galdia igls blers mussamaints da simpateia da sies cantadours scu er digl numerous auditori. Pigl dirigent cun en sentimaint profund, pigl carstgang cun en carisma particular, pigl om cun abilitads musicalas da gronda valour e pigl musicist tgi è er en agen dung da surpurar sia quietezza e proximitad tar las canzungs segl antier chor en mument fitg emoziunal. Modest scu chegl tgi Luzius Hassler è sto igls davos 15 onns, tiers igl grond success cu gl Chor viril Surses, è el sa laschea eir bagn aint igl ravogl da sies cantadours e dalla gronda raspada tgi è neida gugent agl concert da cumgea digl dirigent bagnvasia. Chegl conferma er la preschientscha da cunsiglier guvernativ e schef digl departamaint da cultura *Martin Jäger*. Tgi Luzius Hassler è er en bung amei e stimo collega testifitgescha bagn er la preschientscha da *Christoph Cajöri* e *Clau Scherrer*, igls dirigents digl Chor viril Ligia Grischa e Chor viril Lumnezia, tots dus chors veirs «diamants» digls chors grischuns scu igl Chor viril Surses er. Chels treis chors da vallada concerteschian digl reminent communabel tar la Festa da cant federala igl mez da zarcladour a Meiringen (BE), en concert da gala tgi vign an mintga cass a far onour agl nom, graztga allas passa 200 fermas vouchs virilas.

■ **«Per nous en de da tristezza»** Catto igls dretgs plets è alloura er *Maurus Dosch*, igl president digl Chor viril Surses. Per igls cantadours seia tiers esser Pasca en de da tristezza cun avoir da piglier cumgea da Luzius Hassler, è detg igl president cun tung serious. En de da tristezza è dantant betg angal sto per igls cantadours activs ed igls anteriours cantadours digl Chor viril Surses, mabagn er per tot chellas persungas tgi on gia l'onour da canoscher an chels 15 onns cun Luzius Hassler en om correct ed an tottas situaziuns en «bung» carstgang. *Maurus Dosch* è er detg tgi igl dirigent partent seia en pedagog exemplaric e schizont en premgimnast dalla classa superioura schi geia per far exerchezis avant tgi scumanzar cun las provas da cant. An



Blers mussamaints da simpateia pigl dirigent partent Luzius Hassler ed igl Chor viril Surses.

FOTO G. N. STGIER

chels 15 onns scu dirigent vegia el er cunaschia Luzius Hassler scu en scienzist da litteratura. El vaseva la melodia figurativa aint igl text da mintga canzung e chegl scu pacs oters, è accentuo *Maurus Dosch*. Ultra da chegl seia Luzius Hassler sto en veir luvrung betg angal chegl tgi pertotga las provas da cant, mabagn er chegl tgi pertotga las preparaziuns dallas provas seia sies angaschamaint adegna sto exemplaric, è detg igl president digl Chor viril Surses. An chels 15 onns vegia Luzius Hassler bagn gia da romper diversas nouschs musicalas ed er an chella tgossa vegia el musso character e toleranza.

«Prest ena interpresa masanga»

Luzius Hassler sez, igl dirigent partent, è sto fitg commuento digls plets da *Maurus Dosch*, dantant er dalla cordialitad da sies cantadours e dalla gronda bagnvuglientscha digls radond 500 preschaints. Chels 15 onns seian bagn stos intensivs e tuttegn seia chel taimp scu dirigent digl Chor viril Surses sto signia da blera umanitad e pazientzga. Adegna puspe do forza da cuntinuar vegian betg igl davos la buntad e la gronda stema scu er igl sustign dalla supprastanza digl chor e naturalmointg digls cantadours, è managea Luzius Hassler. En veir deletg seia sto per el da far cunaschientscha cu gl scazi cultural rumantsch e cunzont cun la litteratura singulara tgi seia avant mang tar igls Rumantschs. Igl dirigent tgi è piglia da Pasca cumgea digl auditori è angraztgea a tots tgi el vegia pudia manar du-

rant 15 onns chella «interpresa masanga» cun passa 60 omens. Fatg è el chegl cun en surreir da cor, scu chegl tg'ins canoscha Luzius Hassler da mintga antop tgi è adegna en mument plaschevel. Cun surdar agl dirigent partent la comembranza d'onour digl chor è el retschet igl regal igl pi custevel tgi resta per veta duranta e tgi lascha reveiver anc dei igls muments ampernevels aint igl ravogl digls cantadours tgi èn scu para extern deirs scu las nouschs, intern dantant da cor fitg lom.

Persvadia er linguistic

Gio siva l'amprema canzung «En matg maioran», tgi Antonin Dvorák è mess an notas e *Mario Jegher* è translato igl text tudestg an rumantsch, on igls 60 omens cun lour vouchs sonoras attratg la simpateia digl auditori. Ansomma on las tschintg canzungs digl cumponist tschech confirmo tgi igl Chor viril Surses so er interpretar an moda perfetga melodias pi pretensiusas e dad egn digls gronds cumponists tgi dat ainten la litteratura per chors. Ultra da chegl è igl chor er testifitgia dad esser egn digls fermes chors da noss cantun, chegl tgi pertotga la dinamica, ritmica ed armoneia. Tot respect digls cantadours, pertge dasper la prestaziun cantica da vaglia è tar chellas canzungs popularas dalla Lituania er la pronunztga stada schi sobra scu igls tungs. D'attribueir è chegl betg igl davos er alla buna translaziun da *Mario Jegher* ed adattada fitg bagn allas forzas digl chor. Gio siva igl amprem bloc da canzungs è igl auditori sto consciant dall'abilitad cantica digls 60

omens e dalla qualitat digl dirigent Luzius Hassler.

En omagi a Gion Antoni Derungs

En quintet instrumental cun tranter oter er *Anita Hassler*, la feglia da Luzius Hassler, è fatg la punt tranter mintga bloc interpreto digl Chor viril Surses. Fatg on las treis donnas ed igls dus omens chegl fitg professional, decent e cun ena perfecziun singulara. Singulara è alloura er stada la prestaziun digl chor aint igl bloc deditgia agl cumponist Gion Antoni Derungs barmeir. Luzius Hassler è sapientivmointg tscharnia sias cumposiziuns per onorar igl cumponist sursilvan tgi vess chest onn igl anniversari dad 80 onns. Igl bloc deditgia agl grond cumponist è sto la miglra perdetga tgi Luzius Hassler canoscha bagn las forzas digl chor e tgi cun blera labour e cun ena perseveranza exemplarica è pussebel d'interpretar bagn e precis las cumposiziuns scu chegl tgi Gion Antoni Derungs veva mess an notas. Enea daple è er sa verifitgia tgi cumposiziuns lategnas schean agl Chor viril Surses e tgi chellas von bagn a pèr cu gl chor. Igl «Ave maris stella» ed «O salutaris hostia», dus cumposiziuns pretensiusas da Gion Antoni Derungs, èn alloura stadas igl migler mussamaint tgi chor e dirigent en ena unitad ed en'olma. La canzung «Sen la mar», tenor igl text da pader Alexander Lozza e mess an notas da Hans Ludwig Heinrichs, è pretendia digl antier chor concentrasiun cumplagna. An chella canzung tgi cumpeggia ena retgezza da tungs, melodias e stil tgi tanschan digl simpel agl pretensius, dalla calmezza al-

la fortezza è igl chor danovamaintg gia l'ocasiun da mussar sias capacitads.

Per la fegn veirs classichers

Tgi igl Chor viril Surses è chegl tgi pertotga igls registers dallas vouchs fitg angulivo e cunzont er bagn occupo ins è alloura santia bagn tar las tschintg canzungs rumantschas. En masdetg da vouchs virilas pi giovnas cun vouchs virilas da gronda experientscha on testifitgia tgi igl Chor viril Surses totga sainza dubi tar las pèdras digls chors grischuns. Agls 60 omens è reuschia an moda meisterila d'interpretar cun exactezza absoluta ed expressiun totala las ancunashaintas melodias dallas canzungs: Surses, La tgaplotta, La baselgia viglia da Lantsch, Return, L'oraziun d'ena pelegriana e L'orma tgi reiva tar Dia. Tottas canzungs en veirs classichers tgi on strousch dastgea mantger ainten chel tagl cantic da 15 onns Luzius Hassler scu dirigent digl Chor viril Surses. Enea daple èn las interpretaziuns impressiu-nontas neidas sottastritgeidas dalla suveranità digl dirigent Luzius Hassler tgi è proco cun sies chor per en maletg sonor, plagn calour e d'expressiun ferma ainten la sala Grava ple tgi fullanda. Siva da chel bloc cun las pi belas melodias dad Ernst Broechin e Hans Ludwig Heinrichs è mintga preschaint sto pertschert tgi agl chor ed agl dirigent è reuschia ena prestaziun da classa superioura e d'exprimer maximum ed optimum digl cant profan e cant rumantsch. Chegl è er laschea s'accorscher igl auditori cun en lung e ferm applaus tgi pareva da piglier nigna fegn.